

33

BIBLIOTHECA  
SCRIPTORUM MEDII RECENTISQUE AEVORUM

REDIGIT L. JUHÁSZ, SZEGED (HUNGARIA)

SAECULUM XVI.

THOMAS STRETZINGER

ORATIO

DE DIVO LEOPOLDO III. AUSTRIAE MARCHIONE  
IN UNIVERSITATE VINDOBONENSI HABITA

EDIDIT

HERMANNUS MASCHKE

MCMXXXIV. — LIPSIAE — B. G. TEUBNER

BIBLIOTHECA  
SCRIPTORUM MEDII RECENTISQUE AEVORUM  
REDIGIT L. JUHÁSZ, SZEGED (HUNGARIA)

SAECULUM XVI.

THOMAS STRETZINGER

ORATIO  
DE DIVO LEOPOLDO III. AUSTRIAE MARCHIONE  
IN UNIVERSITATE VINDOBONENSI HABITA

EDIDIT  
HERMANNUS MASCHKE

MCMXXXIV. — LIPSIAE — B. G. TEUBNER

Iq. kot.

114.932



## INTRODUCTIO.

### *De Thoma Stretzinger.*

Thomas Stretzinger e Neunburga Forensi (Korneuburg) ortus est. Nec annum, quo natus est, nec eius studiorum et vitae cursum novimus. Stretzinger, ad quem Ioachim Vadianus octostichon scripsit, orationem de Leopoldo III. Austriae marchione habitam praeposito monasterii Claustroneoburgensis (Klosterneuburg), Georgio Hausmanstetter dedicavit, in cuius honorem Cuspinianus ad eius preces librum de historia Austriaca, cuius titulus Austria, composuit. Thomam Stretzinger igitur cum Cuspiniano et Celti et Vadiano et aliis, qui ineunte saeculo XVI. in universitate Vindobonensi studia humanitatis promovebant, familiaritate iunctum esse iure coniecturam facere possumus. Secundum documenta a. 1515. et 1518. Thomas presbyter saecularis Pataviensis fuit.<sup>1)</sup> Praeterea eum munere notarii universitatis Vindobonensis functum esse constat. A. 1521. doctoribus omnium facultatum in aulam universitatis convocatis primum litteras Caroli V. imperatoris, tum bullam apostolicam mandatumque rectoris promulgavit, ut intra octo dies omnes libri Lutherani ad notarium comportarentur.<sup>2)</sup> Bienno post die 4. mensis Augusti a. 1523. Stretzinger mortem sibi conscivisse necrologium Claustroneoburgense memoriae tradit: „A. d. [15]23 mag. Thomas Straeczinger semet suspendit.“<sup>3)</sup> Cuius facti causam ignoramus.

Ex operibus Thomae Stretzinger haec sola oratio a. 1513. typis impressa ad nos pervenit, in qua divum Leopoldum III. Austriae marchionem e gente Babenbergica ortum laudibus celebravit. A. 1492. a facultate theologia universitatis Vindobonensis in festo S. Leopoldi sermones haberi coepti erant, quorum oratorum primus Ioannes Forter ordinis Carmelitarum fuit.<sup>4)</sup> Stretzinger orationem ineunte a. 1513. prelo mandatam die 15. mensis Novembris a. 1512. habuisse videtur. Rector huius anni Georgius Collimitius Tannstetter et decanus theologorum I. L. Ricutius Vellinus fuit. In orationis praefatione non solum Georgius Hausmanstetter, sed etiam decanus coenobii Vincentius Weissenberger commemoratur, quibus opusculum dicavit.

---

1) *Quellen zur Gesch. d. Stadt Wien*, pars II., vol. IV., nr. 6081., 6140.

2) *Conspectus hist. univ. Vienn.*, Viennae 1724, pars II., pag. 111.

3) *Mon. Germ. Necrol.* Tom. V., pag. 105.

4) *Conspectus*, loc. cit., pag. 56.



*De editione orationis.*<sup>5)</sup>

Orationem Thomae Stretzinger sola editio a. 1513. excusa ad nostram aetatem servavit.

*Titulus:* Oratio de divo Leopoldo, | habita a uenerabili uiro magistro Thoma | Stretzinger ex Neuburga Forensi. *Finis:* Impressum Viennae Austriae per Hieronymum Vietorem, et | Ioannem Singrenium. Nonis Februariis. Anno do | mini Millesimo quingentesimo decimo tertio. — Habet fol. 6. — Fol. 1r Ioachimi Vadiani octostichon ad Thomam Stretzinger a nobis in appendice editum continet.

---

*De vita divi Leopoldi III. Austriae marchionis.*

Leopoldi III. parentes Leopoldus II. et Itha fuerunt. Patre a. 1095. mortuo ad gubernacula marchionatus Austriae accedens ab Henrici IV. imperatoris partibus stetit, quo a. 1106. relicto in partes filii eius Henrici V. Agnetem sororem ei in matrimonium dantis transiit. Mox Leopoldus in poenitentiam versus, quod sine causa Henricum IV. reliquisset, a. 1108. monasterium Claustroneoburgense, ut pro admissio periurio se deo conciliaret, pro memoria soceri imperatoris fundavit.<sup>6)</sup> Fama est Leopoldum loco, ubi flammeolum vento valido capiti Agnetis uxoris diu avulsum invenerat illaesum et integrum, monasterium construxisse. Leopoldus in rebus publicis gerendis prudenter versatus a. 1112. et 1114. Moguntiacy et a. 1121. Ratisbonae moratur. Post mortem Henrici V. a. 1125. Germaniae principes eum ad imperium eligere cogitaverunt, quem honorem sibi oblatum reipublicae causa recusavit. Postea ad Austriam tuendam totum se Leopoldus contulit. Agnes coniunx plures liberos peperit, quorum clarissimi sunt: Henricus dictus Iasomirgott Austriae dux, Conradus episcopus Pataviensis et archiepiscopus Salisburgensis, Otto Frisingensis episcopus rerum Germanicarum scriptor, quo suasore pater claustrum ad Sanctam Crucem (Heiligenkreuz) ordinis Cisterciensis fundavit. Leopoldus die 15. mensis Novemberis a. 1136. mortuus in ecclesia coenobii Claustroneoburgensis sepultus est et ab omnibus eadem aetate viventibus Pius cognominatus post mortem honoribus divinis colitur. Saeculo XIV. Rudolfus IV. Austriae dux instantiam pro canonisatione Leopoldi apud Innocentium VI. papam fecit. Fridericus III. imperator et Matthias Corvinus Hungariae rex et multi alii nobiles hoc tempore pro inquisitionis re assumptione supplices erant. A. 1485. Innocen-

5) Cf. M. Denis, *Wiens Buchdruckergeschicht*, Wien 1793, Nr. 90.

6) Cf. H. Maschek, *Kaiser Heinrich IV. und die Gründung des Chorherrenstiftes Klosterneuburg*, Mitteilungen des österr. Instituts für Geschichtsforschung XLVII (1933) p. 186—211. Ibidem libri ad Leopoldum III. pertinentes commemorantur.

tius VIII. Leopoldum sanctorum catalogo adscripsit. Imperante Maximiliano I. die 15. mensis Februarii a. 1506. ossa marchionis e tumulo elevata et in argentea urna mire ornata translata sunt. Urnae hoc Conradi Celtis Protucii elogium <sup>7)</sup> insculptum erat:

Austriaco princeps fueram Leopoldus in orbe  
Iustitia populos et pietate regens.  
Hoc ego fundavi divino munere templum,  
Flammeolo signum dum mihi ab arce datum est.  
5 Innocuus papa octavus dum sederat urbe,  
Tertius et Caesar dum Fridericus erat,  
Hi iussere mei transferri corporis artus  
Atque inter sanctos me retulere viros,  
Ut vota exciperem, quae totus dat mihi mundus,  
10 Nec sinerem cassas ullius esse preces.  
Praepositus tunc Hechtel erat post tempora Christi  
Mille quadringentis octuaginta tribus.

---

7) C. Celtis, *Fünf Bücher Epigramme*, ed. K. Hartfelder, Berlin 1881, lib. V, nr. 19. et H. Rupprich, *Der Briefwechsel des Konrad Celtis*, München 1934, p. 359.

THOMAS STRETZINGER

ORATIO DE DIVO LEOPOLDO III. AUSTRIAE MARCHIONE  
IN UNIVERSITATE VINDOBONENSI HABITA.

*Dedicatio.*

Reverendo in Christo patri et domino domino Georgio praeposito monasterii Neunburgae Clausstralis dignissimo imperatorique regiminis regenti et consuli magnifico eminentissimoque viro magistro Vincentio praefati coenobii decano meritissimo, conventui, patribus et dominis omni claritudinis eminentia praestantissimis ac devotis magister Thomas Stretzinger ex Neunburga Forensi se ipsum plurimum commendat.

Optabat Academicus Plato, qui ab egregio corporis habitu, <sup>1</sup> ut Diogenes Laertius locuples testis est, hoc vocatus est nomine, memoriam suam in libris a se editis relinqui. Is demum Heraclit<sup>2</sup> teorum, Pythagoricorum ac Socraticorum dissentientes rationes profundo et docto ingenio taliter coire disposuit, ut ferme sub unico corpore triplicem philosophiae compegerit statum. Hinc, praesul<sup>3</sup> et imperatorii senatus regens et consul magnifice, decane magister Vincenti eminentissime, tu quoque, sacra patrum et spectabilis conventus collectio, ipse mecum taliter persuasus constitui sincerius modicam hanc et tenuem ingenii mei elucubrationunculam vestris addere chartaceis suppellectilibus rem iucundam, gratam acceptamque me in hoc fecisse arbitrans, tum quo sanctissimi Leopoldi <sup>4</sup> fundatoris et patroni coenobii vestri pientissimi insignem vitam ac egregias virtutes poetarum apologis, historicorum rebus gestis, moralium et theologorum sacratissimis dictis confecerim, tum quia virorum illustrium optima facta ex Plutarcho, Tito Livio, Iustino Trogi Pompeii abbreviatore, Lucio Floro, Diodoro Siculo, Valerio Maximo, Probo Aemilio, Quinto Rufo, Polybio, Lactantio, Ioanne Bocatio. Taceo de primaevis nostrae religionis patribus, quae <sup>5</sup> omnia ad Leopoldum vestrum sanctissimum comparando congessi. Apum naturam in hoc imitatus, quae, ut Macrobius docet, <sup>6</sup> sucum varium in unum saporem proprietate spiritus sui mutant,

ita aequaliter extranea exempla domesticis aspersa inquite Valerio Maximo ipsa varietate multum delectant. Accipite igitur animo 7 sincero et boni consulite, o patres et viri celeberrimi, eam de divo Leopoldo orationem, quam superioribus diebus in facie Viennensis gymnasii publica sub contione recitavi eandemque in chalcographicam notitiam vestris sub nominibus accedere disposui, quae me commendatum, praesentem, paratum obligatissimumque offero. Datum Vienna sub anno domini 1513. 8

### *Oratio.*

Subeunti de laudibus sanctissimi Leopoldi quondam mar- 1  
chionatus Austriae principis pientissimi tam sublime, tam excellens  
ac operosissimum dicendi munus, litteratorum decus et gloria, rec-  
tor magnifice, facultatum singularum doctores virtutibus et titulis  
praestantissimis candidissimi, tu quoque, ingenua auditorum glo-  
merata caterva, huic, ut satis comperto teneri videtur, verba non  
exotica, silvestria aut peregrina neque Hyblaeo, sed Castalio melle  
perlitata, ponderosa, insuper sententiarum suco et sale respersa  
gravedo concinnataque orationis luculentia et verborum prosperitas  
summe ac maxime idonea et pernecessaria censebitur, quibus et 2  
sanctissimi Leopoldi generosum originis stemma, splendor egregios,  
eximiam gloriam, virtutes inexhaustas, innocentiam, pietatem,  
clementiam, liberalitatem, munificentiam, mirificam largitatem, reli-  
gionis cultum, moderationis ac principatus integritatem, regiminis  
excellentiam, vitae beatissimae et feliciter actae sanctimoniam et  
reliqua praeclare gesta optimaque facinora egregie insignita pro  
semihorulae brevitate commendando praedicaret atque efferendo  
magnifice extolleret, cui profecto neque Senecae Stoicorum acu- 3  
tissimi memoria sufficeret, quae tanta fuit eodem in primo libro  
declamationum suarum testante, ut non ad usum dumtaxat suffice-  
cerit, sed in miraculum usque procedebat, neque consentanea vide-  
retur tali Thracis Orphei eloquiosa dulcedo, quae, ut mystico dicitur  
et sub cortice, movere silvas et flumina sistere et feras mites facere  
solebat, neque Hegesiae Cyrenaici philosophi verbosa gravitas, quae  
audientium pectora misere sic affecerat, ut multis voluntariam mortis  
appetendae cupiditatem ingerere videbatur, neque eloquentiae Pisi-  
strati Atheniensis dulcorosa maiestas huic idonea iudicaretur, quae  
tantum valorem habuisse perhibetur, ut ea de re Athenienses im-  
perium eidem obtulerant, quoniam, ubi de divini opificis maiestate 4  
et laude in sanctis suis commemoranda agitur, natura deficit, si-



let ingenium et caliginis nubecula fuscatur, intellectus terreno pondere pressus animusque maiore corporis sarcina eliditur et minus agilis est.

Ad institutam igitur dicendi provinciam accessuro mihi ieiuno 5 ac paene imperito et inculta barbarie pleno livor edax, letalis ventium pestis. Strigosus calumniae bovinator et ii, quibus videbor 6 forte opportunus iniuriae, aculeis acrioribus, stomachosa dicacitate, impetuosa rabie verbisque veneniferis perridicule occursuri frequentem ac crebram huius muneris temeritatem inertia plenam dicendo accusabunt. Sed iras abiciant et turgida deleniant pectora. Ipse 7 non inscius eram haud aliquam esse adeo modestam felicitatem, quae malignantium dentes evitare posset. Idem mihi super sessionis discessum ab his dicendi provinciis dudum persuaseram. Sed 8 crebra ac honestissima postulatione sacrorum theosophantium illectus, persuasus atque inductus, quibus profecto reluctari minime licuisset, maioribusque morem gerere volens, cum et illis parere praeceptum sit, subsiciva quadam necessitudine ad onus illud non mea sponte, sed iussus accessi et de his praetergrediens, ut Chilonicum brevitati consulens observem morem directurus navigii proram in votorum atque institutae professionis expeditionem, ne nauta incertus rapidis pericliter undis, ad immortalis dei optimi maximi deiparam virginem Mariam, unde salus et necessitudinis adiutorium universis exoritur, nobis accedendum est, cuius pietissimo ductu tutior iter reliquum aggredior. Patrocinium eius in- 9 timo cordis optatu ipsi mecum devote imploraturi angelicum Gabrielis et gratissimum recitemus eulogium dicentes: Ave, Maria.

Vetusta scriptorum auctoritas classicique historiarum et anna- 10 lium chronographi, dum illustrium virorum virtutes commemorant, priscos reges, principes magnificos, duces virtute plurima et militari disciplina insignes, proceres, sublimes et reliquos, in quibus spectati facinoris fama claruisse comperta est, afferre et memoriae prodere solent. Gravitationem in eisdem laudant, constantiam appro- 11 bant, magnitudinem animi extollunt, probitatem moderaminisque, sinceritatis et virtutum multiforme exercitamentum in illis amant, praedicant et commendando scriptis perennibus eadem posteritati relinquunt. Hos si quacumque ex parte Leopoldo nostro sanctissimo 12 comparabimus, Leopoldus tales aequali virtutum insignio nedum aequavit, sed indicibiliter antecellens ultra reliquos laudatissimus evasit atque praetergressus est comparatusque vel vetustae gentilitatis principibus aut nostrae religionis primariis hominibus, id

quod in aliis sparsim ac singulariter extollendo commendatur, hoc ferme totum in Leopoldo nostro sanctissimo maiori sanctimonia cumulatissime invenitur, quod satis clare ac luculenter subsequen-  
tium relata historica introductione consequi celerrime poterimus.

Gloriantur alii de antiquitate generis et partu nobili et ge-  
neroso, quales sunt Miltiades, Themistocles et reliqui maiorum  
gloria et sanguinis splendore illustres: Leopoldus hos facile vin-  
cet, qui non ex faece plebeia neque populari editus propagine,  
sed imperatoria et principum scaturigine originem trahens nascitur  
ex familia utriusque parentis summa claritudine, illustri patre Leo-  
poldo cognomine Formoso, matre vero Itha Henrici tertii impera-  
toris filia. Effertur Tiberius Gracchus, qui iuvenis existens virtute 14  
multa clarus et celebris a pueritia fuit: Leopoldus mox natus et  
ab infantia inter opes innumeras et multiplices luxus primum vitae  
exordium sic instituere voluit, ut ad initiorum regulam iuxta divi  
Hieronymi praeceptum reliqua vita decurrere posset. Pomponius 15  
Atticus in pueritia sic explendescebat, ut generosi condiscipuli  
animo aequo id ferre non valuerant: Leopoldus amoeniores litte-  
ras, humanitatis et divinae theosophiae studia iuvenili sub aetate  
complexus est. Cato ille Romanus dietim virtutibus maioribus 16  
claruit atque accrevit: Leopoldus gloriosam virtutem nequaquam  
diminuit, sed ampliori ferventia de virtute in virtutem iuxta psal-  
mographi vocem progressus est. Dion ille Syracusanus multa a 17  
natura habuit bona: Leopoldus Dione longe meliora consecutus  
est bona; nam in corporalibus vitam tranquillam, sanitatem, robur,  
bonam corporis habitudinem et integritatis pulchritudinem habuit.  
In eis, quae ad animum pertinent, ingenio, arte, prudentia, con- 18  
silio, maturitate, summa beatitudine claruit, in eis, quae extrinse-  
cus adveniunt, divitiis, gloria, honore, nobilitate, principatu, uxore  
et liberis felicissime vixit. Erechtheus populo Atheniensi in regem 19  
a Minerva traditur: Leopoldus a deo summo optimo maximo  
Austriacis in marchionem praeficitur. Timotheus paternam glo- 20  
riam virtutibus auxit: Leopoldus quadraginta annis principatum  
Austriae regens maiores suos orthodoxos tanto claritudinis can-  
dore antecelluit, quanto diuturniori et perpetua memoria et singu-  
lari beatitudine ultra reliquos meruit divinitus insigniri. Caius 21  
Fabricius honestatis sequax dictus est: Leopoldus in magna pec-  
candi licentia vel libertate constitutus inter coniugales curas, na-  
torum affectiones, regiminis molestias et saeculi gloriam multipli-  
citer honestatis prae se tulit indicium. Cimon prudenter regni 22

sceptra gerebat maximaque misericordia conspicuus effertur: Leopoldus inter fortunae irritamenta more sollertis virginis vixerat, quae inter spineta flores illaesis digitis decerpit spinarumque aculeos separatim vilesceere permittit; nec minora Cimonicae pietatis Leopoldus subibat munera, sed lassos roborans, vacillantes confirmans, oppressos sublevans, inopes fovens magnum misericordiae opus eisdem impertitus est. Memnon et Aristides iusti cognominati sunt: Leopoldus iuxta evangelici prophetae Isaiae praeceptum taliter in lege et iustitia ambulabat. Veritatem enim dixit, deiecit avaritiam, excussit manus suas ab omni munere, obduravit aures, ne audirent innocentis sanguinem, oculosque clausit, ne viderent malum, nec impium pro muneribus iustificare voluit, quibus iustitiam iusti auferret ab eo. Magnum insuper aliud iustitiae munus suscepit; pupillos enim et viduas et auxilio indigentes tueri atque defendere coepit eosque naturali humanitate fovere atque eisdem prodesse conatus est. Iustinianus Augustalem dignitatem legibus a se editis ornavit: Leopoldus pupillo et humili iustissime iudicavit nec leges umquam iniquas iuxta Isaiae vocem condere voluit vel iniustitiam promovere, quibus pauperes in iudicio opprimeret. Agrigentinus Gellias liberalis praedicatur: Leopoldus vero liberalitatis rationem subierat, cum et aliis bona sua libenter impertitus sit, et ab alienarum rerum cupiditate totus extraneus fuit. Timoleon maluit plus diligi quam metui: Leopoldus taliter gubernationis suae sceptrum tenuit, ut a deo et hominibus dilectus sit. Iason eloquentissimus homines non bello, sed orationis dulcedine acquisivit: Leopoldus populum subiectum benevolentia ita rexit, ut verbo pariter et exemplo cunctis praeesset et clementia, quae maxime principem decet, singulos mansuetiores faceret. Tiberius in exigendis tributis modestia usus est: Leopoldus nedum aliquo exactionis onere, sed neque iniustitia, crudelitate, perfidia, tyrannicidio, cupiditate, discordia, detractioe aut quopiam livoris odio subiectum populum afficere aut deprimere voluit. Alcibiades patriae amator dicitur: Leopoldus benevolentia, amicitia et paterno amore creditam Austriam et patriam tuebatur, ut contra singula discriminum pericula tutelam et necessitudinis iuvamen praestiterit. Phocion Atheniensis bonitatis cognomen sortitus est: Leopoldus vere bonitatis nomine refulgebat, cum nihil in deum, nihil in suos, nihil in proximum, nihil in subactam plebem delinquens neque supina procrastinatione vel ulteriori pigra dilatione a bonitate discedens in via peccatorum stetit, sed in lege domini meditatus est die ac nocte.

Miltiades adeo humilis erat, ut nullus tam depressae condicionis 33  
homo esset, cui liber accessus ad eum non patebat: Leopoldus  
ab omni principatus fastu remotissimus fuit propriamque excellen-  
tiam, ut humilitatis ratio est, contempsit, nam cum superbi pro-  
prium esse solet maioribus non obtemperare, ab aequalibus dis-  
sentire et infimos despiciere.

Leopoldus taliter maiores, etiam vicarium Christi in terris et 34  
Caesarianae potentiae imperatorem honorando tractavit, ut ab al-  
tero Innocentio papa secundo quemadmodum verissimus beati Petri  
filius dictus sit, ab altero vero Henrico imperatore quarto filiae  
suae Agnetis matrimonio meruit insigniri. Nec dissentiebat ab 35  
aequalibus, sed, quemadmodum Achilles ob promissas Polyxeniae  
nuptias a praeliis Troiae se abstinerat, ita Leopoldus ob aethe-  
rae beatitudinis imperium tranquille et pacifice vivere volens prae-  
liorum vastationibus se non contaminavit et subiectos non contem-  
nendo, sed paterno favore tractando eosdem pientissime prosecu-  
tus est. Hannibal principum fortissimus praedicatur: operosius 36  
fortitudinis virtutem Leopoldus exercuit. Esto, hac re Valerius 37  
Publicola, Furius Camillus, Marcus Rutilius, Censorinus et reliqui,  
qui victoria insignes et fortitudine clari fuere, efferantur: praestan-  
tius tamen, maius et fortius seipsum quam hostem superare Leo-  
poldus indicavit. Pyrrhus summus atque invictus fuit et Seleucus 38  
victorem victorum se aestimat: Leopoldus subactis hostibus et  
corporis et animae singulis invictus aetherea in arce imperat po-  
tentissime. Antoninus XVI. Romanorum imperator typum et figu- 39  
ram beati Leopoldi gerere visus est, qui et cognomine Pius et  
pater patriae dictus est: Leopoldus simili pietatis insignitus est  
nomine et titulo sublimi et praecipuo, quo maior non est. Solet 40  
namque pietas Ciceronis testimonio mater esse et fundamentum  
reliquarum virtutum et unum et solum bonum Lactantio teste,  
quod nec daemon malus nec fatum tenet. Priamus ex Hecuba de- 41  
cem et octo suscepit natos: Leopoldus ex uxore Agnete aequalem  
natorum complevit numerum. Octavianus Augustus orbis dominus 42  
filios ad currum, ad saltum et ad multiforme belli exercitium filias-  
que ad lanificium et textrinum opus instruere fecit, ut, si aliquando  
egere contingeret, per artem vivere possent: Leopoldus natos virtuosis  
operibus sic institui voluit, ut perpetuae miseriae aerumnam evade-  
rent. Agamemnon ad placandam Dianae iram Iphigeniam filiam suam 43  
sacrificat: Leopoldus Conradum et Ottonem filios pro religione et  
servitute divinali deo mancipavit. Idomeneus de re sibi quacumque 44

primitus obvia deo sacrificare promittit: Leopoldus mox comperto  
 uxoris flammeolo eo in loco monasterium deo et beatae Mariae  
 virgini indilate erigere statuit. Numa Pompilius templa construxit, 45  
 sacerdotes ordinavit et deorum immortalium cultum ac preces  
 adinvenit: Leopoldus aedificatis funditus monasteriis duobus et  
 restauratis plurimis viros religiosos et deo sanctitate ac preces  
 46  
 continuis devotos eisdem praefecit. Agesilaus vetuit fugientes  
 in templo violari: Leopoldus constructas a se ecclesias apostolico  
 mandato ita communivit, ut raptores de illis gravi sub anathemate  
 pontifex maximus damnavit. Philippus et pater et filius imperii 47  
 divitias in thesauros et bona ecclesiae ac in usus et administra-  
 tionem pauperum ordinaverunt: Leopoldus patrios agros, innume-  
 rabiles opes, multiplices divitias et proprios thesauros in religioso-  
 rum ac pauperum sustentationem magnifice elargitus est. Sub 48  
 Thessalionis Sicyoniorum regis gubernatione tempora iucunda ac  
 prospera fuere: sub divi Leopoldi regimine incolae ab adversario-  
 rum incursione et hostium modestia defensi coeli opifice infavente  
 rebus suis prospere usi sunt. Ptolemaeus magna rerum gestarum 49  
 gloria moritur: Leopoldus summo claritatis nitore ac perfecto  
 virtutum cumulo conspicuus anno domini supra millesimum cen-  
 tesimum tricesimo sexto decima quinta Novembris rebus subtrahi-  
 tur humanis. Diomedes, dum ex clade Troianorum victor reverte- 50  
 batur, cum Dauno rege partem regni sortitus est et Aeneas post  
 diversas et multiplices victorias tutior regnat, Pompeius, Marius,  
 Fabius et reliqui post subactos hostes ingenti gloria triumphant:  
 Leopoldus post huius lacrimosae vallis transitum, post multiplicem  
 obstantium victoriam regnum et sempiternae quietis imperium cum  
 deo optimo maximo consecutus est, quale non Lacedaemonius  
 Leonidas, non Thebanus Epaminondas, non Atheniensis Codrus,  
 non Romani Decii, non Publii Scipiones umquam habuere vel  
 contemplando experti sunt, illicque tranquillo otio, pace sempiterna  
 triumphans aevo immortalis fruitur beatissime. Defletur mors Ale- 51  
 xandri regis Epiri Eumenesque Craterum amplo funere extulit:  
 Leopoldus ab uxore et liberis die funesto dolore luctuosisque  
 lacrimis prosecutus a pontifice maximo Innocentio secundo magni-  
 ifice effertur, plenaria ac apostolica absolutione dignus post mor-  
 tem iudicatur uxorque et filii relictis super morte Leopoldi a prae-  
 fato Innocentio paterno affectu consolantur pientissime. Alexan- 52  
 der Magnus iubet corpus condi in templo Hammonis corpusque lu-  
 lii Caesaris in solidam columnam tumulatum est: Leopoldus in be-

atae Mariae virginis coenobio Neunburgae Claustralis, quod idem extruxerat, religiosissime sepelitur. Prodigia ante mortem Caesaris 53 Iulii facta sunt grandia: Leopoldi mortem tanta miraculorum coruscatio, quae ultra naturam et hominum valentiam erat, sequebatur permaxima. Argus post obitum deus haberi coeptus est, Pallanti 54 divini honores a Parthenis decernuntur Iphicratesque apud suos in summa laude habitus est: Leopoldus multiplicatis miraculorum frequentis maximis imperatoris Friderici tertii instantiis, Maximiliani Romanorum regis Matthiaeque Corvini regis Hungariae, principum denique ducum, baronum, procerum, civium, popularium creberrimis orationibus ad canonisationem sollicitatur, ubi perspecta et examinata vitae sanctimonia et visa miraculorum frequentia ab Innocentio octavo, pontifice maximo in catalogum sanctorum et in minorum confessorum numerum ascribitur sanctusque haberi et ab omnibus venerari praecipitur. Pallas imperante Henrico se- 55 cundo effoditur: Leopoldus sub pontificatu Iulii secundi et imperio Maximiliani Romanorum regis invictissimi ex terrae visceribus, ut novimus singuli, anno domini millesimo quingentesimo sexto magnifice transfertur. Hector ob incredibilem eius prudentiam non 56 solum parentes, sed et patriam perenni nobilitate ac gloria splendidam fecit: Leopoldus terram Austriae illustri sanctitatis et rerum gestarum nitore cantatissimam reddidit. Hamilcar viris, equis, armis, 57 pecunia totam locupletavit Africam: Leopoldus frequenti patrocinatorum opitulamine invocantes et preces devotas ad eum tendentes in bonis corporis et animae crescere dirigit eiusque benigna ope terra Australium augetur, florescit et maiori incremento propagatur. Ulysses dictus est multimodus quasi ad omnia modum habens: 58 Leopoldus vere Ulysses dicendus et his omnibus iustissime anteponendus venit, cum ab eo uno maximarum virtutum exempla habeantur, et, ut de viris nostrae professionis uno verbo concludam, erat in Leopoldo nostro sanctissimo religio Abel, Abrahae fides, patientia Isaac, continentia Ioseph, Iob sinceritas, misericordia Moysi, probitas Samuelis, David, Eliae ac Ioannis vehemens charitas, Salomonis sapientia, Tobiae integritas, Danielis iudicium.

Ex quibus omnibus virtus et sanctitas beatissimi Leopoldi 59 adeo conflata est, ut ad summum laudis maximae cumulum nihil posset accedere. Dixi.



## APPENDIX.

### Ioachimus Vadianus

Ad magistrum Thomam Stretzinger.

*Eruis historiis heroica gesta vetustis  
Et momenta liber maxima parvus habet,  
Quo, quantum fidei virtus sibi vindicet et quam  
Pessundet pietas ethnica facta, doces.  
⁵ Dum meriti titulos repetit Leopoldus honoris,  
Et decus hoc famae te duce maius adest.  
Nempe tibi debent cum omnes, tum Pannonis ora,  
Cuius in obscuro non sinis esse deos.*

## ANNOTATIONES CRITICAE.

*Dedicatio.* — *Tit.* Dedicatio] *om.* — 1. achademicus — 3. cartaceis suppellectilibus — iocundam — 4. Quinto] Sexto — Ruffo — Polybio] Polydoro — 6. succum

*Oratio.* — *Tit.* Oratio] *om.* — 1. perlita — succo — 2. stema — 3. Atheniensi — 6. hii — oportunus — 7. deliniant — supersessionis — 8. subcisiua — 10. autoritas — 13. Milciades, Temistocles — Itha] Etha — 16. acreuit — 17. consequutus — 19. Erichtheus — 20. Thimoteus — 23. Memmon — iusticia — 24. imperium *in exemplari Claustroneoburg. manu coeua corr. in* impium — iusticiam — auferret — 25. eisdem] eidem — 26. unquam — 27. Gillia — 28. Thimoleon — 29. aqusiuit — 30. iniusticia — 33. Milciades — conditionis — 34. quemadmodum] quoniam — 35. Polixene — obiectos *in exemplari Claustroneoburg. manu coeua corr. in* subiectos — pientissimo prosequutus — 38. imparat — 39. Anthonius — 44. Hydumeneus — 48. Tessalionis — Sicyoniorum] Sichimorum — iocunda — 50. lachrimosae — consequutus — leonida — Epaminundas — unquam — ocio — sempiterno — 51. cratherum — lachrymis prosequutus — 52. Hamonis — Mariae] Matiae — 54. Palantho — tercii — Mathiaequae — Vngariae — cathalogum — 57. Affricam — 58. Heliae — Thobiae

*Appendix.* — *Tit.* Ioachimus—Stretzinger] Ioachimi Vadiani ad magistrum Thomam Stretzinger octostichon — 3. uendicet

## INDEX NOMINUM.

*a: Appendix — d: Dedicatio — t: titulus — v.: vide.*

- |  |                                       |
|--|---------------------------------------|
| Abel 58                                  | Daniel 58                             |
| Abraham 58                               | Daunus 50                             |
| Academicus Plato d 1                     | David 58                              |
| Achilles 35                              | Decii 50                              |
| Aemilius Probus, v. Probus, Aemilius.    | Diana 43                              |
| Aeneas 50                                | Diodorus Siculus d 4                  |
| Africa 57                                | Diogenes Laertius d 1                 |
| Agamemnon 43                             | Diomedes 50                           |
| Agésilas 46                              | Dion Syracusanus 17 (bis)             |
| Agnes, uxor Leopoldi III. 34 41          | Elias 58                              |
| Agrigentinus Gellias 27                  | Epaminondas 50                        |
| Alcibiades 31                            | Erechtheus 19                         |
| Alexander Magnus 52                      | Eumenes 51                            |
| Alexander, rex Epiri 51                  | Fabius Cunctator 50                   |
| Ammon, v. Hammon.                        | Fabricius, C. 21                      |
| Antoninus Pius 39                        | Florus, L. d 4                        |
| Argus 54                                 | Formosus, v. Leopoldus II.            |
| Aristides 23                             | Fridericus III., imp. 54              |
| Athenienses 3                            | Furius Camillus, v. Camillus, Furius. |
| Atheniensis Codrus 50'                   | Gabriel archangelus 9                 |
| Atheniensis Phocion 32                   | Gellias 27                            |
| Atheniensis Pisistratus 3                | Gracchus, Tib. 14                     |
| Atheniensis populus 19                   | Hamilcar 57                           |
| Atticus, Pomponius 15                    | Hammon 52                             |
| Augustalis dignitas 26                   | Hannibal 36                           |
| Augustus, Octavianus 42                  | Hausmanstetter, Georgius, praepositus |
| Austriales 57                            | d t                                   |
| Austria 1 20 31 56                       | Hector 56                             |
| Austriaci 19                             | Hecuba 41                             |
| Bocaius, Ioannes d 4                     | Hegesias 3                            |
| Caesar, C. Iulius 52—53                  | Henricus II. imp. 55                  |
| Caesariana potentia 34                   | Henricus III., imp. 13                |
| Camillus, Furius 37                      | Henricus IV., imp. 34                 |
| Castalium mel 1                          | Heraclitei d 2                        |
| Cato Censorinus 16 37                    | Hieronymus divus 14                   |
| Censorinus, Cato, v. Cato Censorinus.    | Hungaria 54                           |
| Chilonicus mos 8                         | Hyblaëum mel 1                        |
| Christus d t — 34                        | Iason 29                              |
| Cicero 40                                | Idomeneus 44                          |
| Cimon 22                                 | Innocentius II., papa 34 51           |
| Cimonica pietas 22                       | Innocentius VIII., papa 54            |
| Codrus 50                                | Ioannes apostolus 58                  |
| Conradus, filius Leopoldi III. 43        | Iob 58                                |
| Corvinus, Matthias, v. Matthias Cor-     | Ioseph 58                             |
| vinus.                                   | Iphicrates 54                         |
| Craterus 51                              | Iphigenia 43                          |
| Curtius Rufus, Q., v. Rufus, Q. Curtius. | Isaac 58                              |
| Cyrenaicus Hegesias 3                    | Isaias 23 26                          |

- Itha, mater Leopoldi III. 13  
 Iulius II. papa 55  
 Iustinianus 26  
 Iustinus d 4  
 Lacedaemonius Leonidas 50  
 Lactantius d 4 — 40  
 Leonidas 50  
 Leopoldus II. (Formosus), pater Leopoldi III. 26  
 Leopoldus III., d 4—5 7 — 1 2 12 (ter)  
   13—17 19—21 22 (bis) 23 26—38  
   39 (bis) 41—50 51 (bis) 52—57 58  
   (bis) 59 — a 5  
 Livius d 4  
 Macrobius d 6  
 Maria virgo 8 9 44  
 Marius 50  
 Matthias Corvinus 54  
 Maximilianus 54—55  
 Maximus, Valerius, v. Valerius Maximus.  
 Memnon 23  
 Miltiades 13 33  
 Minerva 19  
 Moyses 58  
 Neunburga Claustalis d t 52  
 Neunburga Forensis d t  
 November (mensis) 49  
 Numa Pompilius 45  
 Octavianus Augustus 42  
 Orpheus 3  
 Otto, episc. Frisingensis, filius Leopoldi III. 43  
 Pallas 54—55  
 Pannonis ora a 7  
 Partheni 54  
 Petrus apostolus 34  
 Philippus, pater et filius, reges Macedoniae 47  
 Phocion 32  
 Pisistratus 3  
 Plato d 1  
 Plutarchus d 4  
 Polybius d 4  
 Polyxena 35  
 Pompeius Magnus 50  
 Pompeius Trogus, v. Trogus, Pompeius.  
 Pomponius Atticus, v. Atticus, Pomponius.  
 Priamus 41  
 Probus, Aemilius d 4  
 Ptolemaeus 49  
 Publicola, Valerius, v. Valerius Publicola.  
 Pyrrhus 38  
 Pythagorici d 2  
 Romani 39 54—55  
 Romani Decii 50  
 Romanus Cato 16  
 Rufus, Q. Curtius d 4  
 Rutilius, Marcus 37  
 Salomon 58  
 Samuel 58  
 Scipiones, Publii 50  
 Seleucus 38  
 Seneca 3  
 Sicyonii 48  
 Socratici d 2  
 Stoici 3  
 Stretzinger, Thomas d t (bis) — a t  
 Syracusanus Dion 17  
 Tiberius Caesar 30  
 Timoleon 28  
 Timotheus 20  
 Thebanus Epaminondas 50  
 Themistocles 13  
 Thessalio 48  
 Thrax Orpheus 3  
 Tobias 58  
 Trogus, Pompeius d 4  
 Troia 35  
 Troiani 50  
 Ulysses 58 (bis)  
 Vadianus, Ioachimus a t  
 Valerius Maximus d 4 6  
 Valerius Publicola 37  
 Vienna d 8  
 Viennense gymnasium d 7  
 Weissenberger, Vincentius, decanus  
   d t 3



# BIBLIOTHECA SCRIPTORUM MEDII RECENTISQUE AEVORUM

## SAECULA XII—XIII.

RM

**P. magister**, quondam Bele regis Hungarie notarius, *Gesta Hungarorum*, ed. *Juhász*. 1932. — — — — — 5.40

## SAECULUM XIII.

**De orthographia** (incerti auctoris), ed. *Born*. [Apparebit.]  
**Garlandia**, Iohannes de, *Integumenta fabularum Ovidii*, ed. *Born*.  
[Excuduntur.]

## SAECULA XIII—XIV.

**Dantes** Alagherius, *Epistolae*, edd. *Nachod—Stern*. [Apparebunt.]

## SAECULA XIV—XV.

**Ravenna**, Iohannes de, *Epistolae*, ed. *Smith*. [Apparebunt.]  
**Salutatus**, Coluccius, *De saeculo et religione*, ed. *Ullman*. [Apparebit.]

## SAECULUM XV.

**Barbarus**, Franciscus, *Epistolae*, ed. *Gothein*. [Apparebunt.]  
— *Orationes*. Una cum orationibus ad eundem habitis, ed. *Gothein*.  
[Apparebunt.]  
**Barius**, Nicolaus — **Kostolan**, Georgius Polycarpus de — **Hungarus**,  
Simon — **Zagabriensis**, Georgius Augustinus, *Reliquiae*, ed.  
*Juhász*, 1932. — — — — — 1.50  
**Brandolinus**, Aurelius, *De comparatione rei publicae et regni ad*  
*Laurentium Medicen*, ed. *P. Angyal*. [Apparebit.]  
— *Dialogus de humanae vitae condicione et toleranda corporis*  
*aegritudine*, ed. *Iványi*. [Apparebit.]  
**Callimachus** Experiens, Attila. *Accedunt opuscula Quintii Aemiliani*  
*Cimbriaci ad Attilam pertinentia*, ed. *Kardos*. 1932. — — 1.70  
**Corsinus**, Amerigus, *Compendium in vitam Cosmi Medicis ad Lau-*  
*rentium Medicem*, ed. *Juhász*. 1934. 2.—  
**Cortesius**, Alexander, *De laudibus bellicis Matthiae Corvini Hunga-*  
*riae regis*, ed. *Fögel*. 1934. 2.—  
**Debrenthe**, Thomas de, *Oratio ad Pium II. papam*. — *Epistolae*,  
ed. *Iványi*. [Apparebunt.]  
**Facius**, Bartholomaeus, *Invectivae in Laurentium Vallam*, ed. *Val-*  
*entini*. [Apparebunt.]  
**Ficinus**, Marsilius, *Epistolae*, ed. *Kristeller*. [Apparebunt.]  
**Hungarus**, Simon, v. **Barius**, Nicolaus.  
**Kostolan**, Georgius Polycarpus de, v. **Barius**, Nicolaus.  
**Martius** Narniensis, Galeottus, *Carmina*, ed. *Juhász*. 1932. — — 1.80  
— *De egregie, sapienter, iocose dictis ac factis regis Mathiae ad*  
*ducem Iohannem eius filium liber*, ed. *Juhász*. [Excuditur.]  
— *De incognitis vulgo*, edd. *Juhász—Kardos* [Apparebit.]  
— *Epistolae*, ed. *Juhász*. 1930. — — — — — 1.—  
— *Invectivae in Franciscum Philelpum*, ed. *Juhász*. 1932. — — 2.50  
**Pannonius**, Ianus, *Opera*, ed. *Husztii*. [Apparebunt.]

- Philelfus**, Franciscus, Sphortias, edd. *Fögel—Juhász*. [Apparebit.]  
**Ransanus**, Petrus, Epitoma rerum Hungararum, ed. *Juhász*. [Excudatur.]  
**Savonensis**, Guilhelmus, Dialogus, an mortui sint lugendi an non, ed. *Maschek*. [Apparebit.]  
**Seneca**, Thomas, Historia Bononiensis. Qualiter Galeatius Mare-scottus eques extraxit Hannibalem Bentevolum de carceribus et reliqua per utrunque gesta. Carmen epicum, ed. *Fögel*. 1932. 3.60.  
**Strozza**, Titus Vespasianus, v. Saecula XV—XVI.  
**Valagussa**, Georgius, Epistolae, ed. *Juhász*. [Apparebunt.]  
**Vitez de Zredna**, Iohannes, Epistolae — Orationes, ed. *Juhász*. [Apparebunt.]  
**Zagabriensis**, Georgius Augustinus, v. Barius, Nicolaus.  
**Zovenzonius**, Raphael, Carmina, edd. *Fögel—Juhász*. [Apparebunt.]

## SAECULA XV—XVI.

- Andronicus** Tragurinus, Matthaeus, Epithalamium in nuptias Vladislai Pannoniarum ac Boemiae regis et Annae Candaliae reginae, ed. *Juhász*. 1933. — — — — — 1.—  
**Balbus**, Hieronymus, Epigrammata, ed. *Iványi*. [Apparebunt.]  
**Celtis** Protucius, Conradus, Ludus Dianae — Rhapsodia, ed. *Rupprich*. [Apparebunt.]  
— Oratio in gymnasio in Ingelstadio publice recitata. Cum carminibus ad orationem pertinentibus, ed. *Rupprich*. 1932. 1.30.  
— Quattuor libri Amorum secundum quattuor latera Germaniae — Descriptio Germaniae generalis. Accedunt carmina aliorum ad libros Amorum pertinentia, ed. *Pindter*. [Excuduntur.]  
**Fontius**, Bartholomaeus, Carmina, edd. *Fögel—Juhász*. 1932. — 2.—  
— Epistolarum libri III., ed. *Juhász*. 1931. — — — — — 4.50.  
**Naldus** (de Naldis) Florentinus, Naldus, De laudibus Bibliothecae libri IV. ad Mathiam Corvinum Pannoniae regem, edd. *Juhász—Mocarski*. [Apparebunt.]  
— Elegiarum libri III. ad Laurentium Medicen, ed. *Juhász*. 1934. 5.60.  
**Piso**, Iacobus, Opera, ed. *Juhász*. [Apparebunt.]  
**Strozza**, Titus Vespasianus, Borsias (Fragmenta) — Bucolicon liber, edd. *Fögel—Juhász*. 1933. — — — — — 1.40.  
**Verinus**, Ugolinus, Carlias, edd. *Fögel—Juhász*. [Apparebit.]  
— Epigrammatum libri VII. edd. *Fögel—Juhász*. [Apparebunt.]  
— Panegyricon ad Ferdinandum regem et Isabellam reginam Hispaniarum de Saraceniae Baetidos gloriosa expugnatione, edd. *Fögel—Juhász*. 1933. — — — — — 2.20.  
**Warda**, Petrus de, Epistolae, ed. *Iványi*. [Apparebunt.]

## SAECULUM XVI.

- Duditius**, Andreas, Epistolae, edd. *Costil—Juhász*. [Apparebunt.]  
— Opera varia, edd. *Costil—Juhász*. [Apparebunt.]  
**Merenda**, Livius, Hercules — Seilas [Fragmenta]. Ludi scenici, ed. *Tescari*. [Apparebunt.]  
**Olahus**, Nicolaus, Carmina, edd. *Fögel—Juhász*. [Excuduntur.]  
**Sambucus**, Iohannes, Epistolae, ed. *Gerstinger*. [Apparebunt.]  
**Stretzing**, Thomas, Oratio de divo Leopoldo III. Austriae marchione in universitate Vindobonensi habita, ed. *Maschek*. 1934. 1.—

## SAECULA XVI—XVII.

- Istvánffy**, Nicolaus, Carmina, ed. *Holub*. [Apparebunt.]